



Vschinauncha da S-chanf

7525 S-chanf



ENGADIN
St. Moritz

Da la suprastanza cumünela

Annunzchas da fabrica

La suprastanza cumünela piglia cugnuschentscha da seguintas annunzchas :

- Parcella nr. 691, Davous Chesas, S-chanf - refer la saiv e pittüer las fatschedas da la chesa.
- Dumanda per fer reclama per l'iniziativa (Vollgeld) sül terrain public.

Dumanda da credit / surdeda da lavuors SUSAUNA etappa 3

In connex cun las lavuors da schlargiamaint d'infrastructura dals ans passos, vegn fat quist an l'ultima etappa illa fracziun da SUSAUNA. Il böt es da tacher la fracziun da SUSAUNA vi da la rait da chanelisaziun, tenor premissas ed insüras superiuras. Impü es il böt da rimplazzer las lingias dad ova, forza electrica e preparar ils büschens per la rait da fibra da vaider. Las lavuors d'eiran scrit oura tenor submissiun aviert. Il depüto fo la proposta da deliberer il credit bsögnaivel per la lavuors e da suottametter in ün prossem pas la tractanda a la radunanza cumünela ils 25 avrigl 2018. La suprastanza cumünela decida unanimamaing da surder las lavuors seguinta-maing :

Lavuors d'impressari :	Angelini SA
Lavuors da cuvrida :	Walo Bertschinger AG
Lavuors da sanitari :	Pinggera SA

Impü decida la suprastanza cumünela da suottametter l'import total da fr. 1'450'000.00 a la radunanza cumünela ils 25 avrigl 2018.

Cunvegna da prestaziun per promover la cultura

Fin la fin da l'an 2017 d'eira la promuziun da cultura l'incumbenza dal circol Engadin'Ota. Zieva cha'l circol es gnieu abolieu es quista incumbenza darcho tar las vschinaunchas. Per coordiner la promuziun da cultura illa regiun Malögia dess in futur surpigliar quist' incumbenza la regiun. Cun quista surdeda da lavuors paun vschinaunchas cun agüd d'üna cunvegna da prestaziun surder la promuziun da cultura regiunela a la regiun Malögia. In regard l'organisaziun es pre-viss, cha las dumandas per la promuziun da la cultura vegn tratto e decis dad üna cumischiun da cultura cun 5 persunas. La chumischiun as compuona d' ün fin duos commembers da la conferenza dals presidents u da suprastanzas cumünelas scu eir trais fin quatter depütos represchantants da divers champs da cultura. La direcziun da la scoula da musica Engiadin'Ota e da la scoula di musica Regione Bregaglia scu eir il museum Engiadinais ed il archiv culturel restan inavaunt tar las societeds pertuchedas. Per la promuziun da cultura dess gnir spais maximel fr. 150'000.00 l'an. Que correspuonda l'import chi'd es gnieu miss a disposiziun già al circol d'Engiadin'Ota i'l passo. Zieva cha la conferenza da presidents ho decis da suottametter las votantas e'ls votants la missiva per la promuziun da cultura es gnieu l'iniziativa « Wir unterstützen die Kultur in unserer Region » refüso. La cunvegna da prestaziun entra pür in vigur, zieva la revaisa da statüts tres la populaziun da la regiun Malögia ils 10 gün 2018. La suprastanza cumünela decida da suottametter la cunvegna da prestaziun per promover la cultura a la prosma radunanza cumünela ils 25 avrigl 2018.

Cunvegna da prestaziun ospidel Engiadin'Ota

In ram dal schogliment dal Circul da l'Engiadin'Ota stu l'ospidel da l'Engiadin'Ota gnir convertito in üna nuova fuorma da dret. L'ospidel da l'Engiadin'Ota es gnieu transformo in üna fundaziun. In quist connex dess gnir raggiunt il böt da focusser e coordiner l'accumpliment dal model directiv per l'organisaziun dal provediment da sandet i'l chantun Grischun 2013 e las adequatas activitads in ün center da sandet.

Per garantir il provediment e per pudair cuvrir ils bsögns particularmaing dal turissem e da la regiun vegn daspö ans miss a disposiziun üna spüerta da prestaziun ingrandida. Pervi da la pusiziun da la periferia scu eir las variaziuns stagiunelas e cun que colliedas ziffras nu paun gnir miss da disposiziun tuot las prestaziuns correspondent als cuosts. Quist sun las seguintas spüertas chi puon gnir miss a disposiziun:

- Servezzan d'urgenza 24 uras, - Agüd da naschentscha, - Poppins, - Medicina d'iffaunts e juvenils, - Staziun intensiva

Our da quist motiv vegn pels prossems 4 ans invezza scu fin uossa üna garantia illimiteda da deficit fat üna pauschela fixa chi importa annuelmaing fr. 1'534'000.00 per la gestiun da l'ospidel scu eir fr. 100'000.00 per il post da coordinaziun per l'eted e la chüra. Ils cuost per la vschinauncha S-chanf importen ils prossems quatter ans ca. fr. 48'500.00 (prestaziun) e fr. 3'200.00 (post da coordinaziun per l'eted e la chüra) per an.

La suprastanza cumünela decida da suottametter la cunvegna da prestaziun cun la fundaziun da sandet d'Engiadin'Ota a la prosma radunanza cumünela

Contrats per sfrütter gerra e piazza da trattamaint

La vschinauncha da S-chanf ho avaint ans stipulo üna cunvegna culla firma Angelini SA per pudair sfrütter gerra our da l'ova da Varusch. Il depüto ho fat üna proposta a maun da la suprastanza cumünela per fer ün nouv contrat per ulteriurs 5 ans. Impü fo El la proposta da stipuler ün nouv contrat da fittaunza regard la piazza da trattamaint sül areal da la deponia Boschetta Plauna eir per ulteriurs 5 ans. Ziev' üna prüma lectüra e divers adattaments e cumpetiziuns tres la suprastanza sun ils duos contrats gnia surelavuros. Ziev'üna segunda lectüra decida la suprastanza cumünela d'approver ils duos contrats.

Spostamaint lingia d'ova Punt Ota 2018

Causa cha`l uffizi da construcziun bassa dal chantun Grischun renovescha la via chantunela aint il perimeter traunter Tegia – Cha d'Albert, e müda la lingia da la via chantunela, es da spuster la lingia d'ova cumünela aint in quel perimeter. Il proget per la refacziun da la lingia d'ova Punt Ota prüma etappa es gnieu fat bun cul plan d'investiziuns 2018 tres la radunanza cumünela. Il depüto respunsabel ho piglio aint ün' offerta dal büro d'indschegner Caprez Ingenieure AG. Quista firma elavura eir ils duos progets da la via chantunela ed il s-chev da la Swissgrid chi staun in connex cul proget da la lingia d'ova cumünela. La suprastanza cumünela decida d'aderir a la proposta dal depüto e da sureder las lavuors d'indschegner a la firma manzuneda e da deliberer il credit bsögnaivel da fr. 18'929.65 per pudair fer quistas lavuors.

Revisiun da statüts Scoula la Plaiv

Zieva analisas fundedas resguardant la structura e la situaziun finanzia da la scoula da la Plaiv haun ils delegios insembel cul cussagl da scoula da la Plaiv elavuro üna revaisa dals statüts. Il böt es da fer ils adattaments necessaris i'l statüts e da suvgnir structures stiglias. La suprastanza cumünela decida unanimamaing da suottametter ils novs statüts a la prosma radunanza cumünela, sch' ils statüts sun avaint maun in lingua rumauncha. Impü decida la suprastanza cumünela da tgnair la contabiledad da la scoula da la Plaiv a S-chanf.

Rendaquint Bügla

Ils 01. Iügl 2017 ho gnieu lö la festa da luotta « Bügla » a S-chanf. Per quist arrandschamaint ho la vschinauncha da S-chanf sponsorida il prüm premi cun fr. 4'000.00. La direcziun dal « Bügla » ho suottamiss a la vschinauncha ün rendaquint detaglio. Il rendaquint prevezza tar las expensas la valor da fr. 209'131.85 e tar las entredgias fr. 209'443.35, ün guadagn da fr. 311.50. La suprastanza cumünela piglia cugnuschentscha dal rendaquint finel e's ingrazcha per la granda lavur prasteda a la direcziun e'ls voluntaris da la festa da luotta.

Contribuziun implanta da tir

La vschinauncha da Zuoz renovescha l'implaunt da tir Suotarivas. Ils cuots per la renovaziun s'amuntan sün fr. 564'000.00. Per la sanaziun dal paracullas po la vschninauncha da Zuoz fer quint cun ün import da subvenziun. La vschinauncha da Zuoz suottametta a las vschinaunchas da la Plaiv püssas propostas da co-finanziaziun. Las vschinaunchas da la Plaiv s'unischan sün ün import annuel per ils prossems 12 ans: La Punt Chamues-ch fr. 3420.00, Madulain fr. 1710.00 e S-chanf fr. 6270.00. L'import numno es da büdscheter minch'an i'l preventiv. La suprastanza cumünela decida d'aderir a l'import da fr. 6'270.00/an per sustgnair l'implaunt da tir Suotarivas, Zuoz per ils prossems 12 ans. Cun quist agir es l'oblic da la vschinauncha da S-chanf resguardant las ordinaziuns federelas « sur il trer our dal servezzan » e « sur implanta da tir per il trer our dal servezzan » indemniso.

Contrat maschina per laina arduonda

La radunanza cumünela ho decis da fabricher il magazin forestel e delibero l'an passo il credit bsognaivel. Impü ho la radunanza cumünela delibero il credit per il proget d'üna maschina per prodüer laina arduonda per fr. 305'000.00. Il proget prevezza da cumprer, renover ed installer la maschina manzuneda.

La suprastanza cumünela decida d'aderir l'import da fr. 100'000.00 per la cumprita da la maschina per fer laina arduonda.

Moziuns radunanza cumünela dals 28 marz 2018

Reguard la moziun da Jon Peider Lemm piglia la suprastanza cumünela in vista da suottametter il reglamaint manzuno d'avart la lingia d'ova traunter la vschinauncha da S-chanf e da Zuoz a la radunanza cumünela ils 22 gün 2018. Impü es previs, cha las supranstanzas cumünelas da S-chanf e da Zuoz tractandeschen il reglemaint in üna dallas proschas tschantedas per üna prüma lectüra. Quist agir as cunfo culla constituziun cumünela.

Reguard la moziun chi'd es gnieu fat da Curdin Barblan davart da funder üna cumischiun da forz'electricca prevezza la suprastanza cumünela da tractander la tematica per la prosma tschanteda da la suprastanza. La suprastanza ho dumando a la HTW Cuoir a ün offerta per ün proget da sclerimaints fundamentels resguardant gestiun, giuridicaziun e finanzas. Eir per quist tema es previs da purter üna proposta a la radunanza cumünela dals 22. gün 2018.

Fitteda parcegis viafier

Il depüto Roman Parli elavura ün concept reguard la fitteda dals parcegis publics dalla viafier ed il parcer sün lungia düreda sün tuot ils parcegis da la vschinauncha.

S-chanf, 9 avrigl 2018

La suprastanza cumünela